

四庫全書

集部

欽定四庫全書

集部

竹隱畸士集卷五

六

詳校官庶吉士臣陳若霖

侍讀臣孫球覆勘

謄錄監生臣孫女明

欽定四庫全書

竹隱畸士集卷五

宋 趙鼎臣 撰

七言律詩

夜直宿有懷

坐愛王孫不嗣音東家芳草怨何深
柳芽得雨皆青茁花葉隨風故陸沉
未可便成春去恨猶堪自強老來心
直須淡墨題名了一醉相期到上林

二月八日以藉田職事雪中至郊外歸過美之

題于屋壁

簿領勞人不少休，暫因王事得抽頭。
不辭出郭辛勤去，聊作尋春爛漫遊。
酒興欲狂無客喚，雪花方急被風收。
鑿輿不日臨千畝，鬱鬱天田瑞氣浮。

社日過美之兄

鳴鳩喚婦喜新晴，舊燕尋巢乍入城。
雷送雨聲逢甲子，正月甲子既雷乃雨寒留春色到清明。
賞心未向桃蹊發，飽意先從麥隴生。
覓句盡於南畝得，麤官真自少風情。

寒食前一日率趙伯山李漢老楊時可秦夷行
劉仲忱游西池泛舟置酒分韻賦詩以每日江
頭盡醉歸爲韻余得江字因即賦所見

老欲爭春未肯降強陪諸彥倒空缸上林春景宜寒食
水殿樓臺勝曲江花裏人家酤酒斗葦間釣艇買魚雙
眼穿不見春風面翠袖依微半隱窗

寒食道中病目

今年已作暗寒食此日正如盲老翁病眼昏昏迷白黑

幻花隱隱出青紅
人歌人哭千家裏
春雨春晴一夢中
會放目光牛背上
轉頭何事不成空

暮春東陽道中寄鄉里弟兄

天末題詩望故鄉
碧雲煙樹兩茫茫
青山九折屢回首
杜宇一聲還斷腸
別後已成千萬恨
書來不寄兩三行
江南春盡頻相憶
爲有楊梅欲共嘗

仲秋席上呈張幾仲

父老歡呼夾道周
將軍喜色在眉頭
臨邊已見三開府

翫月何妨七倚樓盛事珠璣交履舄豐年酒肉到耒耜
請公徑作通宵飲今夜何須秉燭遊

九日張師席上次韻志康

重陽何處可銜盃瀛海新成百尺臺白雁迎霜前日到
黃花冒雨一時開籬邊歲歲民同樂塞外年年上倚才
況有登高能賦客孫郎聲價擅天台

次韻張衡父冬夕書事

橫笛休吹且當撾幽人夢短不禁茶風琴不鼓自成曲

雪藥無香猶是花
瑚璉少時輕子貢
鷓鴣此日慕張華
勞生正是南飛雁
秋去春來詎有涯

二十二日泛舟曹娥江至蔡家山以晚潮將至
趨陸至白宋堰遂復登舟

區區州縣信徒勞
今日天涯倍寂寥
流水有溪皆赴海
泛舟無處不乘潮
登臨初識山川險
來往空悲歲月消
但可此身長得飽
不妨斗米折吾腰

九月一日舟次雍邱次翟靜叔韻

砌下蛩聲日夜催秋之爲氣信悲哉西風不送愁歸去
白髮能將老到來涸轍久知吾有命壯圖今見子方開
相寬更辱新詩句川上難忘逝者哀

余方哭
子故云

次岢嵐軍寄保德倅同年王粹公

一舍相望馬不前秋風搔首故依然江湖流落三千里
筆硯追隨二十年歎我塵埃凋髮齒知君卜築近林泉
生涯粗足能歸否老大何妨不著鞭

是日晚次晉祠日已暮矣有客呼門甚急問之

則陽曲尉高履伯祥也不鄙謂余置酒叙別感
其志意以詩贈之高嘗客河間河間帥南陽公
以一飯禮焉高每語余未始不感激也故見于

卒章

匹馬青衫忽叩門山前燈火已黃昏蒼顏白髮身雖老
白酒黃鷄意尚存醉裏未嘗呵李廣遠來獨肯送陳蕃
要敦薄俗惟君可感激猶懷一飯恩

塞下

相逢奔走兩河壩來往空驚月再圓王事敢辭同契闊
客遊還喜共周旋暮行野岸泥三尺夜宿人家屋一椽
歸看彭郎應大笑東軒何事不留連

任邱道中值雪贈權邑宰曹弋取道曹河間同僚也

驂騑終日在道路鸚鵡一生遭網羅諸公但欲選才耳
明府其如多事何金中烹魚莫倉卒車下叩角徒悲歌
寄書請問皇華使今日誰堪政事科

塞南塞北平如掌冬後冬前暖似春
鷄唱曉聲頻送客雪藏歸路苦留人
論交自覺于詩薄投分誰知與酒親
恐被應劉來覓句故看子建乞諸鄰

上恭祀圜丘天宇晴霽既慶成數日乃得小雪
御製喜雪詩示羣臣代人次韻擬和

都人夾道袂成陰護駕爭看萬羽林
放仗端門歸內早飛花梁苑慰民深
雨暘時若皆天意夙夜惟寅本帝心
赤子但聞歌擊壤未知何以報君臨

代擬和御製喜雪詩

丙申正月

朝罷正元改歲華都城飛雪夜如沙似知天上焦勞意
來作人間散漫花和氣與春生畎畝恩波隨地徹荒遐
君王只爲豐年喜二月何妨見草芽

喜雪上王尹

正月二日尹被召至闕下是日
拜開封尹方及近郊雪大作

一封細札下明光幕府匆匆夜促裝天子賜書追賈馬
師臣草制拜龔黃東都已散隨車雪西維初留聽訟棠

三日造朝真未速方須杞梓構明堂

京尹制詞太
師所自草

客舍喜雪呈邵稽仲

和氣先來慰旅人中宵溫暖便知春但疑造化回天地
豈料風雲動鬼神洗濯萌芽歸草木掃除瘴癘入埃塵
隔牆似聽閭閻說邵父朝來喜色新

再和二首

天上紛紛地上勻挽先來作塞垣春不憂病客衣無褐
要助詩翁筆有神且可留連遮瓦礫莫教容易雜泥塵
悔將布鼓雷門過謝罪從今欲自新

冬來玉燭更調勻
傍歲先教雪報春色
借樓臺呈氣象
力欺狐兔失精神
故應桃李知陰德
聊許冰霜作後塵
不用漁蓑苦圖畫
使君詩句自清新

次韻邵稽仲喜雪詩

真是銀河落半空
天公捨施作年豐
巧心未到芳菲處
飽意先歸稼穡中
積素乍憑風凜凜
流膏應待日融融
更須今夜邀明月
要看清光幾許同

去冬張若水伯奮以雪詩示余
懶不暇和張屢

趣之因謾謂張侯有雪當奉和二月五日平旦
雪數寸遽作此詩

春分猶著御冬衣寒色憑陵暖自遲入眼未教花惱客
斷腸先被雪催詩酒中有聖曾何敢醉裏尋鄉自不辭
柳絮因風佳句在報君已負一年期

憫旱

陌上行人欲飲水常年四月未炎蒸熱因常侍雖無據
塵類元規自可憎南畝望雲心激烈老巫當午氣憑陵

故應此旱由風伯
訟汝于天豈不能

耿伯順用趨字韻作苦雨詩次韻答之

天公作雨萬龍趨
倒捲黃河不用符
鶴集東山興婦嘆
水添北海助鵬圖
轉緣泥淖嗟疲懦
賡和篇章愧淺膚
夜報燈花雙藥好
忽驚簷溜曉來無

送韓存思誠出守永嘉并寄同年周恭叔

雁蕩山前萬壑趨
故人新剖左魚符
眼中風物皆詩句
到處溪山是畫圖
柑子剝量金尺寸
荔枝遠致玉肌膚

謝公巖畔因行樂借問周郎好在無

耿伯順見和趨字韻詩次韻謝之

白頭冉冉省中趨欲乞君王竹使符漸覺求田真上策
絕知躍馬太狂圖不妨書籍時遮眼已免蚊蚋夜嗜膚
老矣尚思交勝友平生此意未全無

何得之見和次韻謝之

天府春來接步趨立談意氣偶相符詩名高似三都賦
句法嚴於八陣圖數仞未容窺閫奧一斑猶喜見皮膚

不嫌俗客塵埃甚時許篇章到我無

韓循之治守安陽以病求代詔以其子衛尉少卿肖胄似夫爲安陽守以詩送之

入戲萊衣問起居出班條教吏民趨韋平繼世調金鼎
父子同時合虎符一姓連書三守貴魏王亦嘗爲安陽守兩轡今
見四輪朱須將盛事煩耆舊畫錦堂中作畫圖

送趙勝非出守濰州

士是

五十專城鬢尚青左符分得意縱橫吏民猶記孔北海

宗室誰如劉更生秋到郡樓和月上花開後院帶春行
何時我亦驅千騎得傍三齊作附城

送何亭老以直秘閣出守毘陵

爲郎歲久坐無羶夢想扁舟眼欲穿得郡更兼天祿閣
逢人先說惠山泉欲知炙味余雖勇爭下鞭梢子獨先
別後若爲相憶處大江南畔月嬋娟

送李元量知池州

傳聞喜色動周邦日日江邊望節幢天下文章曾第一

關西材氣本無雙，好栽紅藥歸持橐。
却駕朱轡遠渡江，千里不須勞筆力。
從來九鼎尚能扛。

送柳叔達侍知福州

山到甌閩特地奇，滿城樓觀碧參差。
勝游入眼如甘蔗，喜色逢人說荔枝。
痛飲莫辜千日酒，劇談聊付一枰棋。
侍郎豈弟如慈父，想見邦人不忍欺。

送同舍朱君彥明奉使東南措置銅事

鄱人

天邊使節動星辰，銜命歸家得意新。
負弩不須煩縣令。

揮金聊復燕鄉人
錦衣行處江天曉
華表歸時社樹春
暫試銅山陶鑄手
速應西上莫逡巡

送王取道二首

仁如堯舜聖天子
孝似騫參賢使君
拜章北闕墨尚濕
刻印東州符已分
從今懽笑對黃髮
不復咨嗟看白雲
知公閑閣坐自了
比屋孝弟皆欣欣

凜然孝子與忠臣
恩義雙全在一身
來作會稽千里雨
去爲東武萬家春
定將清淨安齊俗
空有謳歌戴越民

想過故鄉須少駐曉行方見錦衣新

送蘓師德主簿領赴官和州

眼看汗血已成駒忽泛扁舟興不踈官小自應親簿領
政成當遣樂樵漁舉行詩禮爲家法收拾江山作俸餘
蘋滿汀洲相憶處秋風寄取一行書

美之得免西行喜甚以韻見報因賀之美之嘗
許候得報即置酒故見於卒章

喜報征車已罷休解鞍聊足放眉頭異時安石難高卧

此日相如固倦游
花恨春遲方半吐
雲欺風弱未全收
正須麴蘖相料理
萬斛舟中試拍浮

次韻仲凡美之喜歸二首

好在青山隱翠眉
遙知不負芰荷衣
越吟淒斷終懷本
宋鷁徘徊故倦飛
世路百憂無似客
人情萬事莫如歸
况逢鄴下多才子
剝判流霞醉落暉

纖纖楊葉舞脩眉
珍重煙光惹客衣
碧杏梢頭鶯百轉
黃茅簷外鷺雙飛
自諳漁父醒猶醉
莫怨劉郎去又歸

今日正南驅馬首未饒陰藿向陽暉

張子儀以省員罷官若不釋然者以詩勉之

折腰斗米笑徒勞薄宦何能損一毛他日未應忘令尹
今年還是省東曹溟鷗得水鱗終變羈鶚逢秋勢必高
隋岸春深好楊柳莫將歸思滯江皋

次韻前南陽太守王傅翁

當年五馬富才華百斛珠璣在咄嗟陌上行春迎曉日
樓頭待月送餘霞屢聞田父歌遺愛時有游人指漸嘉

笑殺即今癡太守二毛憔悴眼昏花

寄武景才

清漳北去水滔滔一舍相望倍鬱陶腐肉豈宜櫻利劍
小鷄聊用試牛刀馮驩久客彈長鋏揚子多愁賦廣騷
無限秋風助佳興故人不見我心勞

鄉人胡舜舉見和再次韻

咳唾珠璣出緒餘舊傳詞賦壓三都先生年輩如今少
鄉里人情似舊無
睡思不禁詩作惱衰顏正賴酒塗

讀

茶糊他年雞黍陪鄉社愧我空空一鄙夫

次韻翟二淳老見寄

十年不到魯東門歸夢長隨酒半醺後進頗能欺俗吏
故交獨肯寄高文老貪北闕千鍾米興在西山一段雲
欲乞此身南畝去移書先報葦溪聞

葦溪吾
隱也

次韻翟淳老

白髮爲郎亦偶然戴盆何敢望青天簿書不足妨談麈
稍入聊能續爨煙竹隱逢秋應怨鶴葦溪過雨欲生蓮

一籌太息輸吾子老圃堂成在我先

余既罷天府窘甚得
一官乃少蘓竹

隱葦溪皆故廬所有也嘗欲作老
圃堂未果而爲淳老所先故及之

次韻夏倪均父見和韓字韻詩六首

浩然骨冷但孤墳疎雨梧桐句法存忽見新詩來故里
錯疑夫子是諸孫江頭春暖堪乘興洲上花開不掩門
日日城南望消息僕夫爲我取征轅

南都詞賦舊傳聞但有風流梗槩存花徑逢春張綿繡
竹林過雨長兒孫跨城樓觀雲連夜隔岸人家水映門

正要子詩彈壓在不應無事滯輪轅

織女機頭五色紋裁成錦段遠相存篇篇境界如甘蔗
一一詞章是外孫載酒有人曾問字談詩無客敢登門
可憐衰病南陽守強駕疲牛逐後轅

眼看花枝作霧昏年來無復壯心存酒盃屢諫愁聽婦

丁口新添喜到孫

余以病目止酒而子舍已得孫

攬鏡自憐霜鬢叟閉

關誰顧雀羅門乘車強欲班春去野老攜壺許傍轅

西郊不雨屢占雲撫字區區志頗存未暇溉田如召父

翻愁告糴遣臧孫願聞滂沛流駕瓦相見歡呼動葦門
乞與高文訟風伯卧龍何事敢停轅

何郎宿草已生墳常老題詩翰墨存陶令一生惟愛酒

孟郊千古遂無孫

來詩念及何得之常子然二
亡友得之嗜酒而子然無子探花梁

苑春騎馬踏雪繁臺夜叩門欲覓舊游何處在故人不
見漫回轅

贈王正叔

持

百年圖史富縱橫痛飲狂歌過一生稷下先生初應詔

關西夫子舊知名，乘槎不覺侵霄漢。
枕石終思返釣耕，好遣家童報消息。
曉猿無事莫相驚。

少夷見和戲以其韻贈之

南郭先生心似灰，一官偶向此間來。
詩才舉世當歸遜，德行何人敢望回。
三徑就荒知有命，十年不調惜無媒。
更添貧病相料理，頗遣黃花近酒盃。

次韻趙伯山見贈

十年眉宇記清揚，班列爭看玉照行。
奏雅不應參鄭衛。

伯山與數客唱
和而索余詩

論交何必減潘陽老妻釀酒新知法雅

子扶犁漸肯堂心計此身歸已足不須辛苦問耕桑

寄楊時可許少尹時有從兄之喪

憂患相隨不少寬出門贏得淚沅瀾豈知桃李爭春色
但覺塵埃逐馬鞍客裏自應書問少老來尤念別離難
故人曾解相思否乞取相思過眼看

余去冬赴南陽過尉氏以不獲見孫少魏爲恨
近於同僚處見孫詩次韻寄之

髮如黑漆未成翁野鶴孤高不受籠
蹠足自疑天宇隘
舉鞭可但冀羣空閑吟秀句邀詩客
自協新聲按舞童
已卜異時干典謁莫嫌俗士不教通

寄外兄張會之

與兄憔悴各他鄉細數平生可斷腸
少日父兄俱過隙
老來兒女忽成行夢游湖北心常折
身在周南鬢已蒼
莫向秋風原上望脊令飛墮轉悲涼

贈如璧長老二首并序

某昔官太學聞諸生饒節德操行義甚高嘗見其詩
文奇之後二十年出守南陽一日香嚴長老壁公過
余氣貌清古有出塵之姿笑謂余曰頗憶太學時否
我饒節也余喟然太息自恨其不可及乃作二詩寄
之香嚴山中石上出菖蒲葉細如絲髮根節宛轉如
龍蛇壁所居庵號倚松嘗約以今秋再訪我於花洲
之上故詩招之且以菖蒲爲請

少游太學饒夫子老倚清松壁上人好與惠休爲後嗣

直疑賈島是前身浮萍暫聚曾交臂獨鶴孤飛遂絕塵
肯念故人今白髮與雲出岫莫辭頻

自爲雲山作主人更邀麋鹿作比隣一齋一粥今禪伯
無姓無名古逸民盡了委緣心似水未捐習氣筆如神
句師石上菖蒲節要度人間八十春

元祐中先人將漕淮南與長樂林旦次中爲僚
其子碩儒膚與余游相好也後三十五年復相
見於京師道舊涕淚已而復遣其愛子窺見過

仍辱贈詩叙疇昔之好次其韻答之

往歲丁年戲綵同別來幾度茁葭蓬貧無負郭嗟吾拙
老有名駒慰子窮雲斷太行雙拱木鶴歸華表兩悲翁
更憐頭裏千莖雪縱得春風不解融

韓次律在許下與葉少蘊唱和他日以寄余因

次韻和之并以寄葉

韓琬葉夢得

尺書不獻罪何逃每讀新詩勝讀騷千里寄懷惟短夢
十年飲德似醇醪次公治郡聲方藉陶令拋官趣獨高

律謂次

俗吏無緣參步武白頭終日漫塵勞

暇日過西曹謁何安中得之李倬冲季咸許出
近詩而未也戲以詩索

眼看簿領眩生花共指牆陰待日斜
水部詩名今獨步河梁句法舊傳家
未容碧海歸深濶應許陽春辨吐嗟
莫爲瓊瑤生校計古人初不廢投瓜

司令謝兢元賜以詩見索近文且叙世舊次韻
謝之

少年識字是天刑
妄意扶搖起北溟
我似羸羊安可駕
子如快劍不須硎
汗傳驥種方新赤
羶付衡門只舊青
滿紙惡詩將底用
爲糊新樣小圍屏

次韻朱琳天球

河鼓仙人喜欲狂
雲輶稍渡漢中央
應嗟此夜成弦筍
又待明年換雪霜
乞巧本非吾輩事
追歡已屬少年場
可憐愁殺朱夫子
竟夕哦詩仰屋梁

春日燕百花堂有懷前太守許子大以詩戲之

百花堂子大所建今守
蔡州蔡州城號懸瓠

風流誰似許南陽人到于今尚不忘筆下涌成三峽水
胷中蓋就百花堂召公棠蔭家家滿潘令桃蹊處處芳
借問蔡州何所似瓠壺形勢若爲長

欽定四庫全書

竹隱畸士集卷六

宋 趙鼎臣 撰

七言律詩

頃官會稽與江彥文趙勝非爲僚蓋二十餘年
于今矣前日相會于庭中道舊樂勝非許以家
釀餉我久而不至嘗請爲後堂之客屢矣輒復
未果意者殆余請之未堅也因以詩戲之并約
彥文同賦

天上王孫馳譽早江南官舍結交深舉頭共惜湖山隔
屈指空驚歲月侵青社欲頒從事酒綈袍尤見故人心
絕聞列屋皆傾國何日纖纖手自斟

既以詩乞酒於勝非而彥文云吾酒殆不減渠
當以餉子九日遶菊獨對空罇而彥文使至因
次前韻戲之

雨裏黃花愁正絕籬邊白酒意殊深曲拳自覺我無用
然諾誰知公不侵便許鋪糟真好事獨令染指亦何心

小哉正恨鷗夷腹傾倒聊堪一再斟

時可屢欲嘗白酒會有客饋余因分以餉之既
而惠詩譏酒器之隘因復次深字韻爲答時可
新買舞鬟甚麗而尚稚故云

解擯先生空儻蕩

趙乙作
解擯

草玄夫子獨精深談詩疊疊

心常折使酒時時氣頗侵欲炙已勤知子意投醪雖儉
蓋吾心端知皓腕如綿弱故遣涓涓只細斟

朱貢父自尚書郎領憲河朔會高陽闕守因攝

帥事以詩寄之且覓蟹螯

清渭三年伴濁涇鴻毛一舉便冥冥帳前共聽將軍令
塞下爭看使者星四坐應劉邀俊彥兩行燕趙列娉婷
只知左手持螯美不念貧交正獨醒

史東美置酒見招偶以釋奠致齋不果往因爲
詩戲之以請他日之約兼呈周與劉敏叔

登車未肯便埋輪置酒邀賓一笑春北海尊壘知意重
太常官職恨齋頻愁霖已逐清歡失勝槩空隨好夢新

喚取江潭憔悴客莫教偏作獨醒人

開蘓叔黨至京客於高殿帥之館而未嘗相聞
以詩戲之

小坡不見二年餘聞到都城信有諸雪裏便回非興盡
魚中不寄是情疎朱門但識將軍第陋巷難逢長者車
別後欲知安否在試憑青鳥問何如

走筆謝仲達餉新橘詩

薄暮傳呼使者忙兒童顛倒着衣裳花開鐵樹何曾識

棗熟東家漫得嘗
厭客欲開丞相閣
絕交先寄洞庭香
直須載酒同君飲
免使繁枝怨曉霜

代擬和御製睿思殿賜宴賞金橘詩

帝燕蓬萊月最良
廣寒仙部出中房
浥霜火齊纍纍熟
噴霧金苞冉冉香
地向江南移茂苑
人於天下醉清觴
願因嘉果論忠孝
報國丹心敢暫忘

東坡兄弟應制舉
日各携硯一入對
廷中而黃門之硯
爲其甥文驥所寶
好事者往往有詩文

以請余故亦同賦

不見東坡老弟昆文章浩蕩失淵源眉山當日人何在
曲阜他年履尚存試想研磨雖有處欲尋斧鑿見無痕
計功何必慚周鼎會使詞林百恠奔

馬宗玉教授自大名考進士歸以詩贈之

清世誰人怨考槃喜聞明詔競彈冠文章得路呈身易
衡石當前下筆難盡拔靈珠滄海暗獨橫長劒曉天寒
知君故是掄才手擬抱焦桐一問看

辛丑二月二十四日以故事被檄詣貢院榜下
訶止觀者五鼓至院前榜未出假寐門臺之上
忽憶秦夷行在院中因作小詩戲之預約西池
之游秦出當以呈也

不妨骭髀倚朱門坐睡聊醒宿酒醺顧我尚猶堪禦侮
逢公那敢更論文水添池面今三尺花減春光已二分
頗許韓非同傳否西城行樂念相聞

榜出即事戲成

黃紙爭看淡墨書人人自恐姓名無用心正似爭蠻觸
出手何如得雉盧路入廣寒人共羨捷傳城濮氣爭呼
回思三十年前事華髮蕭蕭一病夫

奇將赴廷試用韻

憶昔先公一束書起家儋石向來無子孫但欲傳倉庫
婚嫁何曾議鄭盧孝弟一門貧自樂科名三世喜相呼
先公鼎臣洎奇七十年
間相繼以貢士登科
更須力獻平津策奪取龍頭慰
老夫

育下第用前韻示之

人生當讀五車書一第區區汝豈無但可三冬長足史
何須一擲便成盧少年決戰雖當力健將銜枚不用呼
莫共癡兒論牝驪不能再鼓定非夫

容之在藁城聞欲從帥辟用前韻戲之

使者爭飛薦鶚書論才何止朔方無從軍更欲投毛穎
仗劍還思跨的盧塞北吏民方眷戀晉陽耆舊已歡呼
可憐公綽堪廊廟漫作區區薛大夫

再賦杉字韻呈美之

高卧終朝對碧巉肯將志氣逐塵凡眼穿斜谷雙蓬鬢
身在長安一布衫未把漁竿栖漢瀨定隨霖雨起商巖
明堂有日求梁棟認取凌雲萬丈杉

閏月中澣與諸客會於葆真宮鄭顧道有詩次
韻

野性宜將寂寞濱林間景物倍曾親逢棋便可消長日
下馬何妨問主人雨過夏畦供饌美風來水閣送涼新

重遊更待秋風起淨掃池頭醉一巡

汪彥文以葆真韻見贈次韻答之

少年傾蓋海之濱白髮相逢意轉親三伏偶乘偷暇日
一枰聊作暫閑人官清已恠腰金晚詩好因緣夢筆新
火急著成封禪頌屬車方欲議東巡

七月朔集于河沙方免迪辭疾不至已而聞新
買妾甚美用葆真韻作俚語戲之

解佩時時夢漢濱不將喜事報交親圍碁賴作爭先客

買妾方成得意人乍看梳裝傳內樣
剝供頭面買時新
拚須一醉金釵側莫向樽前著暗巡

楊時可蘓在廷元老家有聲伎之奉而又俱爲秋

官屬諸公方以詩請之余恨未嘗識蘓然時可
邀使同賦故亦用此韻

文章華翰九天開二妙同時在一臺
高會競看文陣合
後堂新許客星來評詩故自當歸遜
在寢何容敢望回
已請杏花留一笑不勞羯鼓橫相催

賀韓子蒼遷居

駒著作

南鄰歌舞北鄰呼，藏室仙人肯卜居。
著撰初無千斛米，般移空有五車書。
烏來屋上看殊好，燕集梁間喜有餘。
莫把先生輕相料，錦囊猶自可專車。

山中即事

山谷崎嶇路寂寥，我行今日是何朝。
春歸陽木青先變，雪落陰崖凍不消。
遲日映雲猶未暖，餘寒挾雨尚能驕。
絕聞近舍村酤美，野老相逢苦見邀。

偶成

此身三十九年非高論逡巡已少卑未解營生窮似蝨
不堪作吏鈍如椎春光爛熳然心火愁緒牽連織鬢絲
却羨耦耕人最樂只應沮溺是吾師

移疾

年來樂事不關身藜杖繩床過了春窮在世間真有鬼
錢於我處獨無神稍諳藥性都緣病尚慙官糧只爲貧
不學小兒潘騎省逢人驚恠二毛新

不寐

秋光已向鬢毛催
寒色仍從枕簟來
天外角聲風引去
日邊歸夢雨驚回
愁能醉客非關酒
老欲隨人不待媒
擬放此身無着處
閑時只合且銜杯

寄題寶應縣五柳亭

肯向明時事隱淪
亭邊五柳漫搖春
當年未易勝今日
此地還如見古人
高興不隨霜葉盡
清風長與露條新
何妨便著先生傳
一洗淮南俗吏塵

歸雁亭

東風楊柳杏花飛
曾伴先生酒一卮
前輩風流那復見
小亭煙雨漫相思
城邊春草路南北
山下河梁人別離
一尺短書湘水濶
年年愁絕雁歸時

錦繡亭

買花不惜萬錢空
點綴芳菲似畫工
十樣錦機翻劍外
一年春色在壺中
醒來莫遣風吹碧
醉裡何妨燭映紅
待得他年成步障
寄書來喚葦溪翁

大司成葛雅卿輓詩

兄弟同升世所難
公家伯仲盡鸛鸞
甘泉侍從雙猊坐
國子先生兩杏壇
丹旄隨舟千里哭
豐碑表墓萬人看

白頭故友空垂淚
一紙新書墨未乾

鼎臣得公手帖方
旬日而聞公沒

五言排律

寄高陽宰張即功

方丈仙山客
高陽辯士鄉
聖朝新命吏
茂宰近爲郎
烽火三關戍
塵埃百戰場
幽燕通聘問
蕃漢雜耕桑
政簡

人安堵刑清舍掩棠萬家魚鱗賤十里芰荷香置酒時
多暇裁詩夜未央水搖天影亂風送角聲長驟見秋雲
白相思塞草黃無忘寄消息看取鴈南翔

五言絕句

九月二十六日韓弼夫與十九娘赴官郢州之
京山携家出餞于城南郝氏之園席上作小詩
送韓兒姪咸和

西風吹葉落南浦送行人白酒難留客黃花不當春

自和

卞和三獻後不復見斯人探得連城璧歸時正及春

代弼夫和

京山雖百里何以慰吾人乞取蒲葵扇持歸作小春

淨名境界

老子方丈裏先生餅鉢間須將爲實用過後沒機關

盤齋詩

退之送李愿歸歟兩山間而今乃有此坐能悅吾顏

清風峽

幾被紅塵誤，潛欣玉宇開。
主人賢若此，款待故人來。
過霍子磐故居時，霍已入都。

月下一壺酒，故人於此同。
故人今不見，明月又成空。


石井

山腰一石窟，其深不可計。
靜聽水潺湲，流作澗聲細。

以雙螯盃酒餉阿寶，作詩戲之。

阿寶奇小字也。

雙螯才映筓，一勺僅盈甌。
未足多沉湎，聊堪小拍浮。



欽定四庫全書

集部

竹隱畸士集卷七

九至

詳校官庶吉士臣陳若霖

侍讀臣孫球覆勘

謄錄監生臣雷琳

謄錄副貢生臣杭光晉

欽定四庫全書

竹隱畸士集卷七

宋 趙鼎臣 撰

七言絕句

侍耕詩三首

記取宣和第一年鑾輿曉出勸耕田
侍臣競欲終千畝
大半農夫不暇鞭

田頭老父話生平不學終軍漫請纓
南畝未為遭遇晚
親逢天子問春耕

巍巍端拱聖曾孫束帛如山賁遠村千畝欲嚴宗廟禮
三推親屈帝王尊

和默庵喜雨述懷二首

昨日江頭晚雨天一舟如葉可扁然故人政自把鋤急
歎想當時子在川

一翻雨過艷陽天
李無言還寂然
解道春江斷橋句
舊時聞說徐師川

雨中走筆招唐臣徐子明飲

桃李紛紛落雨餘
愁看春色洗鉛朱
試憑髯許招徐邈
頗復能中酒聖無

鴈蕩山中逢雨戲成詩

試憑溪鳥謝青山
莫遣愁霖礙往還
身是江南趨走吏
暫來能得幾多閑

次韻楊時可雪中三絕句

雪裏孤芳不自難
花心炯炯向春單
可憐風伯能癡妬
故作無端分外寒

見睨消流似發蒙宿雲歸盡不禁風小桃洗面添光澤
未點臘脂已自紅

怕寒終日醉如泥強欲尋春意轉迷柳絮榆錢從約勒
桃紅李白要提携

雪中寄丹元子

陰風一夜攪春冥風定紛紛雪片零想見玉清真境上
白虛光裏誦黃庭

詠史

張湯忍死能償怨蘇李橫屍會報仇
利口有神君看取蓋棺猶解作戈矛

詠史寄毛德修

將軍舍下雀羅寬驃騎營前萬馬攢
冷暖不隨時俗變古今惟有一任安

被檄詣益津過謁城自和元日所題詩

燕舞鶯啼爭窈窕桃紅李白鬪尖新
盡將錦繡遮阡陌春到田家自不貧

初見太行

已作鹽梅濟時了却收霖雨入山來當年富貴汾陽郭
異代功名相國裴

暮宿戍樓詩

樓在李詳寨
塘灤之上

蚊雷汗雨夜方初獨臥譙門氣少蘇睡覺不知星斗落
恍然覓夢在江湖

過邢州柳溪中門扁鐔甚嚴隔戶窺之見荷花
爛然盈沼作

嬌紅姪姪不勝姿只許行人半面窺
恰似姑蘇明月夜
水晶宮殿鎖西施

渡河

野約纔堪一木支行人立馬故依遲
何須更作西征賦
臨水登高盡有詩

至水口聞必欲買舟到懷安縣

不使風帆船上篙工真是箇中強
明朝幸自順流下
醉臥從教溪水長

閩船不用帆
以竹籬為之

仲春至王官鋪壁間讀時可詩戲次其韻云簿
領堆中不舉頭坐令雙鬢欲驚秋蒼生未必須
安石自為青衫作滯留已而時可見之復次韻
解嘲十二月復過此重次前韻

微官相縛共低頭兩見燕南塞草秋說向蒼生應大笑
為誰奔走為誰留

曲村騎置次子磐韻

誰教霧豹不歸山文采時時見一斑奔走正忙詩更好

此心何處得安閒

題穰東驛

并序

元祐庚午歲余自京師將如襄陽取妻子會故人有
客鄧者遂由方城歷鄧抵襄往來經穰東驛蓋三十
三年於今矣蒙恩守藩復過其地疇昔從我之人無
一存者因誦韓退之詩云憶昨兒童隨伯氏南來今
只一身存眼前百口還相逐舊事無人可共論慨然
久之蓋可謂異世而同歎者也乃次其韻

邯鄲枕裏人何在華表聲中鶴僅存世上悲歡三百載
此懷當與退之論

送楊深道淵

高牙大纛立門戶鳴玉腰金皆父兄讀盡床頭書萬卷
他年功業看縱橫

次韻彭作少逸道中小詩

南北東西鬢欲斑臨流太息未知還身居漁父篷籠底
心在秋山爽氣間

次韻杜公美奉使道中見寄

乘槎征路接天潢，笑指龍沙一線長。
萬里歸來心似鐵，歲寒松柏要經霜。

京兆王持正叔以特詔至闕下，除將仕郎放歸。
山意若不釋然者，於其行置酒以餞之。

偶然乘興度幽關，却駕柴車返舊山。
出處在君無不可，豈緣飛倦始知還。

百首新詩興不疎，錦囊盈載出東都。
扁舟莫羨鴟夷子。

自有山堂敵五湖

王欲歸山堂

上王京兆

腰金入侍身逢主裂郡疏封祿速親雅俗坐如周重魯
偷兒爭似晉奔秦

年來輦轂富歡聲囹圄經今四度清路上遺金人不拾
獄中茂草月長生

大道周廬滿帝京怪來無訟里問清數行詔令家家有
到處如逢大尹行

少見姦人探赤白都無惡少擲臬盧西隣禴祭東隣學
看却肥牛不敢屠

謁子約不遇戲書其壁

幾年不識城東路今日相思特地來正使朱門堪炙手
不能一為故人開

水齋

生于水而寒于水都在君家燕座中只箇從來堪受用
何須更遠挹清風

九月十二日詣王信孺賜第因過書院懷李蕭
遠王堯明題於壁二君皆信孺客相繼登第而
王獨第一故云

平原門下客三十桂籍連年得兩賢畢竟文章歸第一
王郎後發獨爭先

郊行三首

柳邊村徑逐門成聊許閒人到處行去懶苦憎牛馬走
歸遲生怯鳳凰城

馬上尋春不見花
藏紅映綠苦週遮
醉鄉眼續初何有
贏得桃源夢到家

盎盎春泉自滿溪
花藏歸路使人迷
少年悞逐車輪去
芳草斜陽何處隄

小橋

山接青天欲盡摩
秋風騷客獨經過
怪來詩句無客和
端為煙嵐發興多

飲方池詩

聞說髯卿酒屢中清尊惟與故人空醉穿馳道歸家去
十里花枝相映紅

夜泛剡溪

剡溪清淺石稜稜夜半星稀月欲升獨恨此間無可訪
不須野雪興方乘

劉阮祠

採藥偶從山裏去尋家却自洞中歸朝雲暮雨漫愁絕
古往今來果是非

雙林寺

邂逅每攜詩卷往猖狂復帶酒樽來
逢春須作遊山興莫待紅殘吁可哀

猶子棄畫盤谷圖戲書其後

欲買青山未有錢每逢佳處但垂涎
一庵所占無多地賒我盤中數畝田

古意堂

破鼎如鐺價萬金古文科斗費推尋
不須更待琴絃足

會有幽人識此心

喜涼亭

小亭新築藕花邊為愛陂塘五月天最好一番風雨過
瓊珠無數落清泉

獨往亭

亭前舊種碧琅玕別後何人著眼看山下溪流接潮水
時憑雙鯉報平安

戲馬子約

羅敷十六鬢如雲五馬徘徊動使君見說黃金難可意
試憑青翼去相聞

歌

玳瑁響鐵未須敲更聽清聲徹碧霄最愛六么花十八
索人起舞舞眼頻招

余有鑑其製如書冊戲號勲業簿取子美詩所
謂勲業頻看鑑者馬子約題詩其上云勲業簿
中頻點檢只添白髮與蒼顏和之

人心各自如其面白首論交尚不情惟有箇中真莫逆
時時相對說平生

十五日冬至次長垣王強夫置酒雪大作醉中
踏雪步行出西城登錦繡亭

蕭蕭冷木噪寒鴉未有春風發柳芽應為亭邊無錦繡
天公散水自成花

戲書紙尾寄猶子棄問錦繡亭春色

新年桃李漸胚胎錦繡亭邊處處栽寄汝館陶三尺素

要知春色寫將來

棄善
畫

赤尉蘇太原寄半丈紅走筆謝之

京兆官曹筆楚中今年春色又成空
應憐頭裏千莖雪折贈枝間半丈紅

遊洪福不果入

愁風愁雨一春中無限芳菲轉手空
不到武陵腸欲斷桃花可惜為誰紅

棠梨

曉驅羸馬日將中
眼飽何曾念腹空
可是愛花狂不徹
棠梨樹下覓殘紅

欽定四庫全書

竹隱畸士集卷八

宋 趙鼎臣 撰

表

夏祭禮畢賀表

修禮地祇義蓋嚴於報本昭假烈祖志尤篤於奉先熙
事備成和氣充塞

賀中

恭惟皇帝陛下道該萬有德備三

無心正意誠一貫兩儀之蘊天明地察再躬三至之祠
丕顯哉文王之謨何以加聖人之孝臣心存北闕身在

南邦想漢殿之威儀望雲殊遠助堯民之鼓舞擊壤何
多

天寧節賀表三首

天維顯思載錫祖宗之慶歲亦陽止篤生堯舜之君屬
肇啟於元辰共傾歡於率土中恭惟皇帝陛下躬契歷
數生知徇齊不忍之仁每推恩於四海宜民之政方受
福於無疆臣服寵至深奉使有守千官就列既阻於造
朝萬歲遙呼第勤於祝聖

千載一遇元首明而庶事康十月為陽聖人作而萬物
覩凡預戴天之烈咸傾向日之誠賀中恭惟皇帝陛下歷
數在躬剛健其德忠厚及乎草木孝悌通於神明時乘
載夙之祥申錫無疆之福臣邈居江海注想闕庭俾壽
而臧喜一人之有慶式歌且舞均萬國之歡心

天祚明德既聖聖以相承世有哲王實元元之共慶協
此陽月之序眷吾真主之生凡目見與耳聞皆手舞而
足蹈賀中恭惟皇帝陛下德合天地功光祖宗垂堯舜之

衣裳饗文武之逸樂屬屆生商之旦共傾擊壤之情臣
將命遠方馳誠禁闥望清光而百拜莫遂捧觴效喬嶽
以三呼敢忘祝聖

謝復官表

失職之誅咎將誰執滌瑕之惠恩許自新載惟疎遠之
蹤獲在記憐之域感雖有所涕乃無從謝中伏念臣吏事

本疎人才甚下黃緣之使冒昧選除雖憊心而疲精僅
能補拙然撥煩而剗劇要自非常果驟速於大訶終亟

蒙於恩貸此蓋伏遇皇帝陛下惟刑之恤御衆以寬日月麗天躬運神明之繼雷雨作解時推曠蕩之恩特棄夙愆稍還舊物臣敢不默思僥倖深自激昂猶可噬臍蓋前非於既往敢忘刻骨圖後效於將來

賜笏謝表

象齒之珍具嚴臣禮御府所賜特出上恩寵過而慙感深以泣

謝中

伏念臣少嘗執卷壯乃扶犁朝覲雍容心敢

期於穀璧江湖放浪手粗識於魚竿比再被於使令俄

屢膺於錫予詔書褒異神明非黃霸之才賜服光華長
短稱少陵之意仍擇滿床之富重班柱頰之奇此蓋伏
遇皇帝陛下錫禹玄圭輯舜五瑞不獨信賞必罰以立
治功至於推食解衣莫非恩意曲示儀容之煥俾增措
紳之榮臣敢不奉以周旋飾其固陋遠嗤桐葉遽成茅
土之封深愧甘棠惟願子孫之守

太后還政代賀表

聖后謙沖德超今古詔恩汪濊澤徧華夷天地休明稚

嗟呼舞

賀中

竊以二帝之美在為天下而得人匹夫之情

乃或豆羹而見色其度量如此之遠故載籍罕得而書
未有獨斷閭闔坐安社稷功有萬年之託政無朞月之
留蓋自開闢以來莫如國家之美恭惟皇帝陛下欽承
慈訓寅御寶圖崇德報功固且極九州之養推恩博施
又將同四海之懽因寬庶獄之辜俾預滿堂之樂臣幸
司使事方攝邊屯限拘符守之嚴阻奉闕庭之賀臣無
任

代賀皇太后表

不世之功天下無以稱德非常之澤聖人所以廣恩道

實曠於前聞禮必循於故事

賀中

竊以光烈明德之於漢

其善不過於小廉太姜仲任之於周所紀或非其大節

固未有躬值國家之變獨成社稷之謀臨朝貶損則如

彼其謙復辟果斷則若是之勇脫重負其如釋避大美

而不居皇情重違聖意先定恭惟皇太后陛下坤載萬

國母慈兆民擁佑嗣君上副裕陵之託推還朝政遠隆

先獻之風蕩無能名
鴈不可尚臣側聞大慶屬在遠方
莫預外庭之班
抃呼北闕徒與塞垣之老鼓舞東朝

代賀元會表

履端於始正統紀於一元
當寧而朝集貢珍於萬國際
天盛典亘地歡聲

賀中

恭惟皇帝陛下德象春熙治因歲

首內篤叙於正父仰欽若於昊天恩同庶俗之和肇舉
三朝之會車書共軌頌瑞歷於河湟贄幣在廷格獻琛
於朔漠天人合應福祿來成臣迹遠周行躬持漢節望

清光於黼座莫遂稱觴布法象於屬城敢忘體國

代慰祔廟表

臣某言伏准進奏院報今月某日哲宗謚號皇帝神主
祔廟禮畢者易奠以虞既備送終之禮寧神於廟益增
如在之儀凡逮照臨詎勝感慕臣某誠哀誠切稽首頓
首恭以哲宗謚號皇帝道存撫御躬致憂勤念甫閱於
玉衣遽永藏於宗祏伏惟皇帝陛下孝深罔極痛切因
心願少抑於聖懷庶大安於民望臣以守職在遠不獲

奔詣闕庭臣無任

代賀收復銀州表

鼠盜弗賓自貽伊慙王師致討所向無前天開日月之

新地復山川之舊含生抃蹈遠俗昭蘇

賀中

竊以夷狄盛

彊讐由五季黎元塗炭坐閱百年版圖雖具於職方賦

貢不輸於天府俗既樂於姑息論因以為固然惟時睿

主之興克紹先皇之烈誕修邦政遠致天誅一將西馳

係名王而東至靈旗朝指舉連城而暮歸矧茲銀谷之

饒實據秦川之要既深逼其巢穴將遂鋤其本根崇朝之勲拭目以俟斯蓋皇帝陛下布湯聖武體堯聰明欲萬物皆得其宜懼一夫不獲其所惟茲伐罪實在弔民下武繼文已著昭先之美車攻復古游收攘敵之功曠無前聞萃在今日臣遠持使節恭聽吉音執銳被堅莫效鷹揚之力舞手蹈足空馳燕賀之情

代賀收復鄆廓州表

伐罪弔民兵以順動攘戎復土師不留行僅於浹日之

間坐收兩郡之衆功高振古慶溢敷天

賀中

竊以本朝務

在安邊中國非樂用武蠢彼西域逖為匪民矧隴右之
遺黎盡山西之故地惟宗暨祖曰聖與仁念一夫之向
隅嘗太息而拊髀裕陵致討列郡縣於熙河永泰徂征
闢土疆於湟鄯方倭七旬之格俄聞一簣之虧逮膺智
之紹休極旰宵而軫慮算皆先定役不再興明明廟謨
運神兵於堂上茫茫禹迹見征虜於目中用成破竹之
奇殆若探囊之易捷傳萬里威震四夷此蓋皇帝陛下

通駿文聲布昭湯武紹復先王之大業鋪張對天之闕
休永維西顧之勞實愍南征之怨暫勤方略俄致蕩平
爭為簞食之迎喜若時雨之降黃童白叟盡襲衣冠蔥
嶺玉關復頌正朔固宜告殊勲於清廟攄宿憤於先皇
頒賞勞還洽恩榮於將士揚威耀德示禍福於氐羌諒
無尺箠之煩行有長纓之繫臣遠司外服恭聽吉音奉
雲陛之清觴莫陪都護想天顏之喜色猶忝近臣臣無
任

代賀河平表

九叙載歌水宜潤下百神受職河亦安流蓋曠古之殊

休實太平之盛福

賀中

恭惟皇帝陛下以政治國惟德動

天崇明祀以禮山川廣大孝而安宗廟用迪王公之懋
克臻涇瀆之寧臣幸寘周行獲聞大慶莫預造廷之列
詎勝擊壤之情

代賀九鼎赦書表

超越之績丕冒於前聞曠蕩之恩亟蒙於率土際天盛

典旦地歡聲

中賀

恭惟皇帝陛下以寬愛民周智創物獨

契一言之合坐成九鼎之安將斂福以錫庶民故推恩
而及四海產祥降嘏既覺寤於黎蒸去殺勝殘遂空虛
於囹圄臣忝司外部獲奉德音謹與吏民講道國家之
慶冀令閭里識知詔令之寬

代謝除侍讀表

省闈清切慙非正長之材經幄深嚴輒備討論之數德
隆天而厚地心臨淵而履冰中謝伏念臣見識迂愚素無

譽望少嘗涉學粗不廢於家傳壯益觀書蓋親蒙於聖
訓所得僅通於口耳其習非有於淵源敢圖溫詔之下
臨許與諸儒而入侍重念君臣之際會莫如父子之遭
逢鳴玉腰金並綴嚴徐之列細旃廣廈俱陪褚馬之游
求諸古以幾希揆於臣而過幸此蓋伏遇皇帝陛下好
問則裕求善無饜日躬萬務之繁時緝六經之奧天之
高矣每下濟而愈明舜有大焉常樂取以為善俾殫蹇
淺益助深崇臣敢不紬繹舊聞激昂懦志不獨分章摘

句說至於千萬言其亦考古驗今書取其二三策庶企
聖牆之伋或收愚慮之千

代謝兼侍讀表二首

改司天府未知舉職之方入侍金華彌積尸官之愧寵
榮稠疊慙懼并交謝中伏念臣佔畢鯀生挈瓶小智夤緣
章句之業冒塵俊造之科浸煩使以頻仍稍清塗之眇
邈丁寬傳易時但日以將軍轅固為詩書乃同於城旦
久失邯鄲之步屢興墨翟之悲獨荷慈憐洞明底蘊人

或輕於李路許以升堂言有謗於樂羊為之按劍曲示
隆儒之寵俾兼勸講之華此蓋伏遇皇帝陛下大以善
同裕而好問明雖齊於日月學每至於芻蕘冀於口耳
之傳或有涓塵之益故雖謏聞亦許備員臣敢不紬繹
放紛激昂衰懦比趙張而居後實愧王尊陳堯舜以造
前願師孟子

具官臣某昨奉告命伏蒙聖恩除臣兼侍讀尋具奏辭
免今准詔書所請宜不許臣已於今日供職者仰對

明綸內慙虛薄入趨邇幄益負兢凌臣某

中謝

竊以書陳

二帝之謨則曰順考於古道禮稱三代之學亦云習近
於正人蓋將恢廣於猷為是必鑒觀於往昔洪惟嗣聖
纂紹先謀覽上世帝王之書周知治忽選耆儒博碩之
士悉俾討論預陪清燕之間敷述微言之緒往當厥職
未易其人伏念臣少無穎拔之才老有耄昏之累徒以
荷四朝之獎育寢而假六職之典司以簿書刀筆之勞
遂陞於要劇惟章句誦數之習獲覲於清光驟膺宸扆

之知擢寘經聞之列能非倚相使進讀於典墳貴謝富
平復得聯於簪橐莫遑遜避寶冒榮恩此蓋伏遇太皇
太后陛下總覽治綱周旋聖學思用該通之彥鋪陳德
義之經深懼顓侗難勝簡拔敢不溫尋素業澡雪煩襟
摘句上前其盡聖明之興悉心官次不忘蚤夜之思儻
有補於毫分誓不渝於始卒臣無任

代謝賜詔書表

大哉王言偉訓詞之深厚坦然帝制粲雲漢以昭回几

逮見聞不勝鼓舞恭惟皇帝陛下為政以德視民如傷
深居九重之中坐見萬里之外念更化定令之指皆經
世御俗之宜吏或便文以自營政乃倚法而日削思警
庶官之聽躬形寶墨之文而臣叨奉使軺例膺詔札已
礪磨於琬琰具刊著於典謨口誦堯言敢廢觀風之職
目存犧畫誓為刻骨之銘臣無任

代謝轉金紫表

紀前聖之宏休甫成大典班史臣之懋賞亟辱殊恩雖

懷遷進之榮彌積滿盈之懼

謝中

恭以哲宗皇帝慶當傳

啟功實紹堯修明典章崇美法度大綱小紀何止於億
萬事成功盛德具載於十六年臣以庸虛預聞綴緝濫
吹屢更於國史汗青無補於皇猷逮終紬繹之勤輒冒
甄升之峻矧叨塵之素過致秩序之已崇缺然朽質之
微登此庶僚之首第深跼蹐何以克堪此蓋皇帝陛下
立愛惟親因心則友祭焉如在感霜露於西宮思之不
忘想規撫於紹聖洎信書之奏御躬膚藻以發揮冠乎

帝典之嚴出自聖文之興而編摩弗敏論次非長攘臂
其間久耗三鍾之粟無功而受又收百困之木仰惟慈
憐容此僥倖臣敢不感恩思報居寵慮危蠹國已多方
且食上大夫之祿殺身有益其敢忘古烈士之風

代謝除刑部尚書表

貳選曹之政事初乏建明長憲部之官聯頓成超躡情
籲天而不獲身躋地以靡容謝中伏念臣以至庸極陋之
質而遭遇於盛時以既冠方壯之年而叨塵於膺仕竊

自甘於輩流之後俄見知於隱約之中詢考其言親臨
便殿訓提以學躬被德音亟升桂籍之華仍擢粉闥之
峻天官務劇誤被選除卿寺秩高再容忝冒稍躋書殿
遂陟從班輦轍慎於選才攝官者累月銓衡難於任職
待罪者二年驅策盡出於淵衷處分悉煩於宸翰譬諸
弱羽蓋欲卵而翼之嗟此愚人可謂負且乘矣今寵私
之若是宜報塞之謂何心在牛羊所期茁壯手翻簿領
詎覺沈迷衆人爭笑其徒勞明主獨憐其盡瘁豈圖過

誤復此遷升雨露徧及於一門父子並登於八座趨會
朝於班次喬梓低昂聽步履於聲中弓箕先後竦士夫
之歌艷曠古今而濶希此蓋伏遇皇帝陛下百工允釐
九德咸事迪知忱恂而不蔽於能否之實因任原省而
必稽乎黜陟之公邃旒宸以深居凜神明而獨斷謂臣
朽糞墻而雕朽木雖曰無以踰人察臣超北海以挾太
山蓋亦未嘗擇事因加獎擢務使激昂臣敢不銘以肺
肝誓於頂踵絜稅之才甚下敢意功名犬馬之力方剛

願圖忠孝

代謝開封尹到任表

已試無狀鼯鼠既難於五窮因任不移司馬遂成於四
至職參經幄朝列舊班前叨出綽之嚴預止循墻之請
感深次骨厲極薰心謝中伏念臣本以孤生出逢盛旦章
句訓詁粗嘗涉躐於筆硯之餘岸獄捶笞未始發形於
夢寐之內既蒙恩之過矣遂承乏以偶然一冒選除三
臨浩穰取充位而已不過碌碌俗吏之為有可觀者焉

曾無赫赫古人之績中屢遭於哆侈輒仰賴於蓋容俄
鍾陟屺之悲亟迫呼門之詔付之兩郡察其羸瘠而不
任留以五兵姑使雍容而在列豈圖過誤復玷使令官
曹不改於平時僚屬尚多於故吏歸鴻未定笑汲汲以
復來磨蟻何知自團團而不去第緣恩重不覺命輕此
蓋伏遇皇帝陛下清明在躬剛健其德攬羣才而並用
孚衆志而不移老馬無奔走之能尚憐識道聾丞有靜
拙之益聊俾効官存加鞭策之勤示在記憐之域重念

臣氣緣憂耗術與才單數任使則衆媚其專久習熟則民慢其令雖慈父之命敢擇便安而明主之前所宜控告願積消塵之効少須旬月之間駑馬無奇力既殫於十駕深林有幸恩倘賜於一枝

鄧州謝表

莅東壁之圖書默慚忝冒剖南陽之符竹曲荷矜憐既聯書殿之華仍典帥藩之重恩深次骨感極薰心

中謝伏

念臣蹤迹至孤品流甚下賜第十人之列昔蓋偶然抗

塵三紀之中今則老矣頃由踈賤誤被察知既偶簡於
淵衷至仰煩於宸翰升諸天府寘以地官粵從銓總之
司復亞浩穰之政數趨便殿屢奉清光聖心頗察其無
他天語嘗憐其久次遂解喧囂之職俾從英俊之游豈
謂妄庸重膺寄委惟鄧故國實漢別都陂澤流通衣食
自足塗路僻左賈客不來苟能奉法以撫民自可終日
而無事海中三島夢疑蝴蝶之飛洲上百花興覺滄浪
之遠靜惟僥倖有此叨塵此蓋伏遇皇帝陛下能否並

觀威福獨運才有數端之取士無一介之遺莫九鼎而
御明堂大興制作朝西戎而臣北敵一統華夷而臣獲
齒搢紳初親鉛槧修泰山之祀阻陪汶上之朝守申伯
之藩獨起周南之歎顧所蒙之若此念欲報之謂何雖
召父居前難繼古人之髣髴然堯天在上實聞聖訓之
叮嚀冀臻康靖之風不辜臨遣之意

代杭州宇文侍郎謝到任表

分符百越偶及暮年易地三吳僅踰一水俗相安之頗

舊令不戒而已孚仰荷榮恩伏深感涕謝竊念臣素無學術端遇聖時便蕃清切之除寂寞事功之補念立心之有本粗守愚而不移不敢合黨締交惟義所在但知奉法遵職當官而行雖甚拙於身謀實盡關於聖聽一昨繇浙而左自江以東俗久玩於因循事不勝其滅裂動欲循名而責實竊恥便文而自營心雖小勞治亦粗辦敢謂褒嘉之誤重叨委寄之隆惟杭故都抑臣舊治昔暫游而若夢今復至以如歸却父老之大錢已慙劉

寵擁兒童之竹馬深愧細侯由寵渥之過優致冒塵於
非據此蓋伏遇皇帝陛下允迪俊德灼知宅心增重神
考之華追繼泰陵之志日月所照思萬國以咸寧雨露
既濡懼匹夫之不被故於守土尤務得人而臣獨以羈
孤屢膺付畀責十駕於駑馬望一割於鉛刀雖地重人
微不稱湖山之氣象而政平訟息冀無閭里之嗟吟歲
儻計而有餘老豈知其將至臣無任

--	--	--	--	--	--	--	--

欽定四庫全書

竹隱畸士集卷九

宋趙鼎臣撰

劄子

代進瑞應圖劄子

臣比因進對嘗具奏請乞倣尚書禮部瑞應圖之制將本府自春以來所獲瑞應別為一書編錄奏御幸蒙聖慈特賜俞允臣謹斷自政和六年之會盡五月卒凡若干日以本府境內暨畿縣所獲甘露芝草珍木瑞麥之

祥與夫囹圄空虛之日路不拾遺之人合若干釐為五篇目曰政和畿內瑞應記其當以形見者具圖所以如左恭以聖德昭明格于上下發祥降祉應圖合牒不勝區區螻螻譽堯之心無以自見輒繕寫進上冒黷天聽無任隕越昧死之至伏乞宣付史館取進止

代乞駐蹕府學劄子

臣恭以陛下樂育人材建立庠序開封府實輦轂畿甸之域天子所自治之地首詔執事並興府縣之學而有

司推遷殆且十年博士弟子僑寄他所甚不稱明詔意
致煩陛下申以程督曾不踰年之頃黌舍完成生徒四
集秋某月有金芝二本產于大成殿之木上而本學生
楊汶等一千一百五十八人相與踴躍誦嘆合辭而言
以爲乘輿方躬郊丘之饗吾學乃輦路所經從今芝實
挺生殆先聖先師蒸出瑞物以報吾皇之德茲甚盛之
舉謂臣某默不以聞何也臣竊以謂郊祀慶成之日千
乘萬騎扈蹕還宮雖道出府學之南懼非所以仰勤天

步之臨也然而諸生伏清道之左聆屬車之音奏名通謁抑有著令如蒙天慈矜其懇誠示以恩意少緩六龍之驅壹紆重瞳之顧如古式間以寵新學則多士仰德孰不競勸四方聞風得以矜式以副陛下隆儒重道之意不勝幸甚臣待罪京邑職事所及有所見聞不敢緘默謹昧死以聞取進止

代奏陳畿內有行義孝悌之民劄子

臣恭以陛下身蹈曾閔之行生知堯舜之仁即位之初

首以紹述之政倡於朝廷然後敦睦親族表章八行躬制其法訓迪天下士民競勸風俗忠厚敦見明白遐不作人京師實首善之地固宜有真賢實廉發聞于鄉以稱陛下之休德也檢會昨據祥符縣申舉人賈高有孝悌和睦嫻恤六行里閭列狀乞如詔令學官考驗具如事實及據東明縣申有民陳奉安自幼不食葷酒喜誦道書父亡廬墳今已三年謝遣妻子志操刻厲尉氏縣張師厚兄弟并姪五人同居三十餘年詣官自陳願以

所有舍業永不分異乞書之籍以付子孫咸有文狀藏於所屬臣謹按賈高行義實應詔書所有陳奉安張師厚等皆田野無知之民非有師友淵源之資而孝悌自然勇於為義實皆陛下教化惻怛陰中其心故能卓然自入於善臣愚不佞備貧輟職在承流宣化目所觀見不敢緘默謹具以聞取進止

乞外郡劄子

某供職以來到今累月職事黽勉偶逃曠敗忽苦脾疾

脚膝流腫屢在假告情不遑安太府要劇非養痾之地
欲乞朝廷矜憐非敢避事特賜改授一近闕小郡或在
外宮觀差遣一次以安愚分

雪趙子巖劄子

按所雪者共三人應作雪
趙子巖等疑脫去等字

檢會開祥兩縣令佐昨因常平官吉觀國奏劾閃避不
賑濟奉聖旨知縣范祖舒趙彥臣先次勒停并佐官並
令御史臺取勘尋有臣僚論列吉觀國喜怒自私誤人
之罪將開祥兩縣令佐妄行奏按奉聖旨吉觀國送吏

部某契勘昨來被水之際開祥兩縣令佐並係本府分
差使臣管押于逐頭項應副救護各有排日食宿去處
及隨逐所差官職位姓名至于救護賑濟了畢並無遺
闕其常平官舉發不當已蒙朝廷察見其非反罪之矣
則兩縣官初無罪犯所有祥符縣丞燕昭隣主簿吳友
已據他司保明得旨免勘訖獨有范祖舒趙彥臣趙子
巖三人未經除雪不作據逐官詣府陳訴委屬非辜欲
望朝廷詳酌將逐官昨來所得指揮特賜改正施行

代開封尹奏獲到闕遺物劄子二首

臣契勘乃者上元之夕天府獄空及兵民以闕遺之物獻于樓下陛下幸聽羣臣班賀且命有司書之于史矣距今才一月日而本府左右獄相繼再空并自閏正月十八日後來軍民李青等凡若干人節次以所獲闕遺金銀驢馬緡錢等物輸之于官不敢有隱推原蹤跡事狀甚明長老歎息以謂自有識知以來咸所未嘗聞見茲實陛下至仁盛德和同天人教化深美風俗忠厚受

報收功方在茲日而又適當寒食清明之間都人士女
嬉遊娛樂而狴犴廓然無有留獄吏卒束笈聚桎梏
而晝睡行路之人舒愉肆意若委貨財而寓諸國家
也駿功偉績於是殊特史臣所當續書而不厭者臣不
勝大願伏乞以今來本府寒食節日再奏獄空及續次
受納到闌遺事實宣付史館取進止

又臣近於二月二十一日上殿曾具正月十八日以後
本府所據諸色人送納到闌遺金珠等物已逐一具名

數進呈訖契勘自上件月日後至本月終計九月據軍民傳質等納到金銀珠璣等物計八件凡一十有二人其尤異者新城門之外車轍之間人迹稀少而傳宥子得黃金釵以歸其父宥不敢隱遠來詣府救焚倉卒之際寶貨狼藉平時貪人所為揭篋以趨攫金而徃之秋也而張用劉祥得白金釵號於市中莫有應者因舉以歸之官小兒郭宜哥去家而迷不知所歸婦人鄭氏得之携至府庭請所付與仍願姑育于家不受贍恤之直

此皆高義實廉人所至難而匹夫愚婦安而行之議者
或謂去古浸遠俗益偷薄又謂三輔浩穰五方錯雜吏
治尚武不可以忠信期待今陛下一出關遺賞給之令
而輦轂之民凜然競勸效見如此與夫兔置雖在中林
不忘祇肅較此量彼孰易孰難然後知向所謂唐虞三
代之俗不可遽復者皆淺近妄人臣待罪天邑目所觀
見不勝螻螻區區踴躍不避冒瀆天聽之頻謹復具陳
如左取進止

狀

越州大禹寺奏請名額狀

右州司契勘本州管下會稽縣有夏禹之廟去郡城十里載在祀典千有餘年祠旁有僧寺一所掌廟之管鑰及其埽除基趾勝絕室宇完備而舊無勅額止曰大禹之寺因循相承有失奏請恭以朝廷方復禹績疆理天下會稽乃禹之所葬圖牒具存神靈馮依不與他比雖守吏承詔祭饗以時齊民畏威祈報以禮而主守不專

護治不嚴未足以稱國家崇明奉祀禹功之意今來欲
乞朝廷詳酌依崇寧二年十一月二十四日已降指揮
特賜本寺一勅額歲許度僧一人使之承續洒掃世掌
廟事凡祠宇之修繕草木之封植責以歲時毋敢有壞
郡守縣令時至而謹察之有不如令必罪主者庶幾廟
貌嚴飾明靈顧懷下以慰一方歸嚮之誠仰以祝聖壽
延長之慶臣等不勝至願

代乞卹趙提刑狀

子諒

伏覩具官某竭節公家盡心職事自臨所部夙夜孜孜
毫髮細微無不經意朝廷察知其勤命以再任子諒受
詔感激益思竭盡以報所蒙昨於今年夏中因大名府
內黃縣羣賊作過子諒冒暑追捕不遑寢食賊旣窮蹙
因悉就擒雖獲於隣州其實子諒迫逐之力也比緣聚
教保甲徧詣屬縣衝犯苦寒奔走道路行至禧縣感疾
以卒病不獲訪醫藥沒不獲在家室勤事以死聞者淚
流伏乞聖慈察其盡忠憂國忘身賜官其子使繼祿食

葬事所須量加給賜庶幾盡瘁之吏知所激勸臣與子諒職事相聯而又死於臣部不敢緘默謹錄奏聞伏候勅旨

代開封尹為徐積請謚狀

某伏覩故楚州教授徐某行孝之美比迹古人經術之醇見推學者自頃擢第不復進仕操守堅正始末不渝昨崇寧初朝廷方興學校之制某以本路提舉學事蔡觀之命委以計議首至楚州與積討論究觀條畫皆有

法度既而有司大比淮南一路之學楚為選首今積不幸物故不獲親見聖朝學制之大成竊聞本州士人具以昨來興學勤事之功請于部使者援張舉體例乞賜追諡部使者既以聞于朝矣按積行義不在張舉之下如蒙朝廷特賜考察節惠易名賁及泉壤不獨慰積之平生風于四方足以表勸某待罪輦轂不當僭越緣徃者推行學政與積共事今淮人之請實藉以為言故敢妄冒干黷朝廷不勝下情惶恐之至

代辭免轉官狀

承命震恐以懼以慚伏念臣智慮本疎才用殊短猥蒙
聖慈誤賜驅策夙夜怵惕懼于不任乃者導河為梁適
在本部復被推擇委以應辦都畿之右財用素絀仰體
聖意不敢不勉凡金穀薪竹之物夫役之衆以數計之
殆四百萬有奇相屬於途僅及期會雖然臣以營繕宮
闕事務衆多前蒙指揮許以往來應副今賴天之休河
翁而右以貫大岷梁于山間利及萬世此禹功所無有

三代所不及實皆陛下聖功妙用之所立而羣執事奔走竭力之勞也臣坐而蒙成獲免於戾顧已幸矣安可比肩諸臣膺受懋賞不惟有愧於私議抑恐遂速於煩言仰累至明其體不細所有告命臣不敢祇受已送河南府左藏庫寄納去訖伏乞聖慈追寢誤恩以安愚分

代奏芝草狀

據某處申送到芝草尋看驗得數內九莖連十一葉者一雙莖而連葉者若干形如層雲色如紫金合大小凡

若干本須至奏陳右竊以國之西都守衛陵寢陛下聖德欽明孝思深至前降詔旨將躬款謁之嚴而三川士民引領望幸上書詣闕者不知其幾千人聖恩穆然而未俞也和氣薰蒸震于珍物金芝煌煌布護畿甸其尤異者九莖連葉駢生層出實為瓌瑋奇特之觀茲乃祖宗神靈顧懷孝饗思欲覺悟皇情啟發天意前志所謂依類託寓諭以封巒者其符驗殆若是也臣等方司留務目覩嘉祥踴躍歡呼不敢默已謹以前件芝草若干

本並繪畫到圖狀若干軸詣闕進獻以聞

薦霍侍禁換文資狀

伏覩某官蚤游太學嘗被教養中緣廕補遂受班行好
學樂道行誼修飭文章博美詞采炳然用之軍旅實乖
其志方朝廷長育人材程其器能之使如安國者儻得
因其所長以自著見被之儒服宜有可觀兼契勘昨來
高陽關路安撫使司河北路轉運司東路提點刑獄司
官嘗具奏請乞與安國換授文資未蒙施行伏乞聖慈

特賜詳酌許令安國換一丈資別授合入差遣使其激
昂足以勸善臣等忝備邇臣不敢緘默謹錄奏聞伏候
勅旨

繳進河議奏狀

右臣伏以先事而言則言有難信之患後事而諫則事
有不及之憂雖然忠臣慮國不謀其身孝子顯親思述
其志言之先後一也顧當否何如耳伏念先臣某當元
祐之末實為河北路轉運副使方是時水官建議回河

蓋以累年功之成者十旣八九獨先臣居中罔敢阿徇
請順水性導使北流進言於朝至於再四奮孤忠觸羣
黨抗單言遏衆議讒鋒謗焰幾不獲免尚賴陛下哀憐
照察曲賜全護遣使按視旣施行矣不幸後來水官眩
惑前議竟興力役斷塞北流奏功告成中外稱慶已而
先臣以病賜歸退伏田里雖及困革不忘朝廷常慷慨
謂臣曰河本無事妄人擾之耳今乃如是恐不三數年
河無安定之理誰當復為上言之乎臣飲淚泣血退書

其語刻之肌骨銘在肺肝方是時豈暇規後效計將然乎徒以不欺之誠著自平昔雖時有用捨而志不可無故也伏見去年河已東決舉齊之西汎濫千里有司極力僅能塞之而積淤久高終不順快迨及今夏沛然北流決於闕村如建瓴水陛下哀矜元元愍悼墊溺臨遣諫大夫賑裁恤窮且俾臺郎共視河事仁恩德意遠近周浹流眊餓夫拊手涕泣雖未復故土瞻舊丘而人人悅欣咸自以為更生也臣竊悲先臣抱孤子之志而事

不獲申建忠蓋之策而言未及用遽先朝露齋恨冥漠
今日已決之闕村乃先臣之所願開者也今日既淤之
東流乃先臣之所力爭者也往昔使萬有一如先臣之
言則河患廣博雖不遽平而水得所歸功必有漸決不
至於敗壞蕩徙如今日之貽朝廷憂也回河之役幾年
矣薪芻之所費力役之所用臣不敢為朝廷惜也金粟
之所耗爵賞之所頒臣不敢為朝廷惜也所重為朝廷
惜者兩河數千里間有田不得種藝有廬不得歸宿死

者轉體於溝壑生者寄命於道塗去歲旣已若此今年
又復如此謂之天灾臣竊以為非歲之罪也恭惟朝廷
清明議論公盡方遣使者出臨河防宜有成謀定策歸
報于上然微臣區區猶抱遺說陳父書冒不測之誅而
獻芻蕘之議者非以希榮於旣往而干澤於方今也誠
以河溢臯陸垂二十年已失之機事不及悔將善其後
必謹於先而先臣之言曩實誤中奏草具在尚可推攷
儻蒙朝廷俯賜采覽鑒已然之得失察旣往之成敗校

短量長稽驗當否於以裨贊大策協成緒功使長河底
平得效塵露雖結草之報未易如此此先臣之遺志而
臣之所不敢忘者也然後退伏鈇鑕下見先臣使九泉
之魂得以瞑目豈非臣之素心宿願者乎臣愚不足以
知河事竊獨耳剽日久嘗聞諸先臣曰河之可以一言
蔽者趨下而已自橫壠六塔商胡小吳宗城內黃百年
之間水皆西決則地勢高下豈不可見今之大議不過
東流與北流耳使河誠東而可以行則雖竭天下之力

而回之猶將請諸朝而不敢以為費也柰何地有高下之形水有逆順之勢今年雖塞明年且決來歲儻行後歲必淤借使神禹臨之亦將無如之何矣如或順而治之則庶幾數十年其無河患乎正今日之明效大驗也然議者每挾塘泊以為言不以近事觀之河既東徙而塘泊固已淤矣雖有司嘗欲濬治之蓋亦有所重為而未能也且其所浸害者獨滄與乾寧間耳使向之未嘗有塘泊則將無以為禦敵計乎臣有以知其不然也請

得以事譬之據靈武之城則西戎稽顙次古北之口則
北敵請命昔常恃此以為固矣今雖未能復之而西北
兩邊豈嘗一日乏守備乎此尚人事之所及而猶可以
力勝者耳水之為物非有情也柰何與之競而不釋哉
先臣之緣河事進言者甚多臣不敢以偏舉謹取最後
乞治北流開闢村河門及申相度黃河利害所二狀繕
寫投進伏望聖慈特賜睿鑒降付有司看詳裁擇施行
冒黷天聽無任隕越昧死待罪之至謹錄奏聞謹奏

書

與修史舍人手書

某惶恐再拜修史舍人內翰閣下某不肖願見門下之日久矣愚甚且賤竊自鄙陋不敢妄以姓名輒自聞于將命者前日亡友闕止叔之病遂獲因緣瞻望履舄止叔之歿也執事不以為愚而辱諉以事敦匠薄遽不得究盡所欲言者翌日嘗干典謁冀粗白於一二未獲承命不勝悃悃拳拳之愚敢復以啟具之惟執事察焉某

死罪止叔文學行義自執事所深知姑置是事而一旦不幸至於大故內無骨肉強近之親外無心腹紀綱之僕無錢以供飯含具棺槨天下之窮者尚復有過於此耶執事聞訃匍匐躬哭而親臨之凡止叔所以得就木者待執事之力而後能某雖愚已深服執事之義矣今逝者已矣要於無可柰何然哀死者而及其生是又君子之所不能已也止叔家素貧乏兄弟仰祿以養其母母年七十二女未嫁惟有一子斃然尚幼興言及此不

覺涕零此固執事所為盡然傷心者雖然資之以財財盡而不可繼託之於人歲久而不能保必將濟其窮而恤其家某以為當使澤及其孤兒然後為策之良也恭惟朝廷既已察知止叔之賢凡其待遇而假優之者皆非羣工庶僚之所可望而執事有昔日之好居今日之地然則撫止叔之孤而存關氏之後非執事將誰望乎某冗賤且疏幸見之日殊淺不當僭越以干高位者之議伏自惟念妄於止叔有一日之分而執事仁心惻怛

計所樂聞而不厭者是以冒進直前而竊不自量也區區之誠宜在躬稟而閤守嚴甚懼於不通故敢遣人仰冒台聽狂妄不韙伏須罪誅無任俯伏俟命之至不宣

與趙伯山書

某啟高陽統郡十一清河在其南三關居其北皆其封境之所隸節制之所及也屬吏之以事往者更出迭反如織緯然獨清河之為州人物盛麗飲食甘美又多賢士大夫今人樂從之游雖數不厭然而僕自去秋逮今

幾年奔走道塗者至不可以數計往來諸郡者相踵也
乃獨不得復至所謂清河者豈英游勝會神所吝惜抑
數竒不耦動輒齟齬邪每自悵失不能去懷奉所貺教
如見眉宇伏承涉暑起居甚休足以為慰十詩在子磐
處屢索未肯出時可投効勇去頃刻不可留雖子磐亦
自謂五日京兆也河間人物自是不能復如往日矣今
賴復得志康遜叔志康一病殊恐人比來方可緩帶聞
仲忱當詣平戎日夜望其過我乃爾躊躇何也天下之

寶固當與天下共之夜光安得獨玩於隋掌豈諸公豪
舉復有以禁切之乎某幸事之間勢必罕出但病懶嗜
卧冠履俱廢特無如趨府何耳隨意作書以發笑噱不
復有先後之序餘願自愛

與劉李高書二首

李高足下河間一別歲且周矣思念惘惘殆無以喻比
得賢叔中行書乃承今春復枉於有司浩然東歸以便
甘旨之奉甚善甚善僕素所期於李高者非以科舉利


不利也今復尚可言邪然季高遂自絕曾不有書問訊
我過矣僕自春初隨府來河東未幾府罷當去此久矣
而法須俟代者因未得卽去顧僕豈樂此者邪并州苦
寒夏多電秋早霜風土麓惡飲食儉陋大都不逮河朔
者十七八惟酒極醇醖果實蒲萄之美冠於四方旣悒
悒不自聊間嘗劇飲徑醉設有核而品嘗之同僚之賢
者家藏異書甚富幸獨許僕觀焉異時足下見仲宣勿
作故眼看也適過中秋方兩日念去年之遊無與共者

因復取酒自慰遽起作吾友書以發千里一笑信手而
寫不復銓次想足下不怪

季高賢友足下相別殊久滋益奉思歸自并汾嬰以俗
事未果為左右之間客自京城來送示令叔中行書并
以吾友書兩通為貺是時方病宿酒展轉牀枕間醒未
可而睡不能意象殊惡而小子育忽驚告曰劉季高有
書來僕立起出戶外已不復知有酒讀盡兩函書累八
九番如對辯士接說客聽其語數千百言夸者如倨戲

者如侮媚者如取激者如怒甚矣哉吾子之善為詞也
僕在河東凡十月日官况牢落幾不可堪既得歸不翅
若棄涕唾吾廬雖陋有竹隱以待賓客閱書史家故所
藏書滿一大屋讀之累月蓋未能什一時時與羣從兒
曹作小詩相唱和間輒奕棋投壺怡然終日而鄉隣有
好事者頗來入吾社中口諷手談繼以觴酌號呶呼笑
私甚樂之但私居難得酒縱得輒不佳不能滂濡淋漓
以供諸客之豪思如往昔與吾子為高陽之飲是真不

可得也苦熱作書不復序次相見未有日惟萬萬為器
業自重



欽定四庫全書

集部

竹隱畸士集卷十

詳校官庶吉士臣陳若霖

侍讀臣孫球覆勘

謄錄副貢生臣杭光晉

謄錄監生臣任溥

欽定四庫全書

竹隱畸士集卷十

宋 趙鼎臣 撰

啟

問候蘇內翰啟

某啟某伏念掃舍人之門素馳心志斂參軍之版獲造
庭隅曾徵左右之容輒叩熒煌之坐飾鄒陽之固陋雖
聲私誠霽魏相之威嚴蓋踰始望恩加一眄榮重千鈞
矧叨禮貌之隆竊等門閭之役賜韋公之雲朶圭竇生

輝頌文舉之酒樽龜腸徑醉屬迫循陔之養亟成遵陸
之行代馬增依居遠北方之僦井蛙自失夢回東海之
遊悵挾日以旋驅邈如秋而結戀恭惟雅俗坐鎮方民
大和澹乎自持綽然有裕伏以某官熙朝間氣冠古真
儒所謂千載之逢奮於百世之上躬蹇蹇以匪故民巖
巖而具瞻續春秋以著書權衡王道傍離騷而挾藻衣
被詞人顯膺謀帥之求出總殿邦之寄軍中改觀閭外
生風竚勤宣室之思行速鋒車之召師榮三錫奉穆穆

之綸言階煥六符据潭潭之槐府信諧輿議實允壯猶
某方走魏臺浸睽燕館撫萍蹤而地僻望棠舍以天遙
冬律易道塞垣滋凜伏乞上為宗社倍調寢興

上蘇內翰端明啟

某啟伏以震雷奮地蠖在屈以咸伸明月麗天蟲處宵
而必見物因時動人豈願違苟上比之得宜孰退藏而
自悔是以三千周士慕赤鳥以鳬趨五尺鄒童瞻象環
而蟻附况乃時逢旦暮迹倚門墻一瓢之樂易甘依歸

是幸百世之師難遇親炙為榮竊陳款款之愚仰丐循
循之誘願賜觀而隱几辱與進以趣隅卑疵而前隕越
於下恭惟判府安撫端明侍讀秉靈江漢蘊氣風雲傳
孟子之大醇亞仲尼之將聖鴻文參乎造化高誼薄於
穹旻鳳凰景星世人爭覩泰山北斗學者具瞻蓋董相
有王佐之材而賈傳通國體之論契半千之昌運飛第
一之英聲諸公時愧於登先當宁深嗟於見晚蘭薰雪
白更險阻以備嘗玉振金聲歷燥寒而不變天昭乃聖

朝右斯文首延魁壘之儒家掌凝嚴之任階翻紅藥鳳
游西掖之池花對紫薇蓮引北門之燭視昭回而潤色
代深厚以敷言帝制坦明約六經之旨趣商盤詰屈同
三代之文章俄建屏以班條旋賜環而掌禮邦咨大典
朝講上儀脫簡缺書宗祝醉心而靡對奧篇隱帙博士
卷舌而未言率斟酌於蕭規盡發揮於孔思元元本本
而殫見摧文士於筆端隱隱絃絃而愈盈挫田巴於稷
下經素優於聖域名益重於朝廷可謂社稷之臣弗愧

班聯之望坐黃堂而決事兵衛靡譁開鈴閣以宴賓詠
觴不廢四鄙想其風采八州安於教條僅於彌年之中
盡飭庶蠱之弊會膺渙號更命坤維燕南方積於去思
劍外已歌於來暮矧受恩之良厚宜結戀以尤深顧如
鰕生實荷隆禮伏念某仕本為祿才非過人置散投閑
既幸寬於罪戾奉令承教獨過被於知憐嘗叨慰薦之
榮重辱借留之誤念箕斗之無實何以致之雖父兄之
見慈不過如此竊妄懷於感慨深有意於激昂藏之寸

心煥若皦日惟巴蜀之都會乃西南之奧區時安治平
士樂閒燕吏衣肯變於齊俗獵較諒同於魯人願遵遊
豫之宜益順節宣之適上綏倚注俯慰瞻依區區之誠
眷眷於是

上許冲元啟

某啟竊以遠聞仁政陳相負耒以輸誠願見相君魏勃
掃門而借便蓋以地分廩陞人有等威天曜三階列上
公于前宿周班五等綴下士於後陳顧名分以甚殊豈

崇卑之可犯未有長於蓬茨之下素無根柢之容忘腐
朽之弗雕輒趨趨而幸進希光孔室宜得罪於倚牆跂
踵齊廷殆蒙呵於鼓瑟冀垂寬赦薄霽威嚴庶殫款款
之愚獲效區區之意伏念某幼而不慧長仍甚蒙類棗
膏以浸昏比冀椎而愈鈍昧道懵學幾下愚而不移飽
食移居非後生之可畏徒以運丁偃伯朝屬右文後長
者以徐行漸摩高誼聞先生之餘論啟發冥襟猥承延
世之恩思懋過庭之訓勉為童技竊跂壯游麗靡相先

悔子雲之少作怛怛自視愧韓愈之初心輒因跼蹐之
求誤玷招徠之選漆雕方仕素懷未信之慙尹何為官
彌積多傷之懼亟辭蕭綬歸奉萊衣默安溫清之娛坐
忘時月之久固嘗伏膺佔畢妄意磨鉛探賸鉤深總緝
百家之緒研精覃思上下千載之間希自贖於面墻庶
頗增於覆簣至於讀古人之糟粕對黃卷之聖賢雖為
之執鞭而欣未嘗不廢書以歎況乃時逢旦暮迹寄埏
鎔邁百世之師所宜親炙享一簞之食自適依歸是當

竭蹶以爭趨詎可伏身而不見然而禮因位隔情以勢
違非駿蔑之賢豈一言而遽善無毛遂之勇宜三年而
未聞始於茲辰副此微願伏遇某官四朝元老一德真
儒居諧宵象之求出偶從龍之會心如金石可謂社稷
之臣言炳丹青自然公輔之望暫解廟堂之寄聊均屏
翰之休坐玉帳以運籌獨當一面佩麟符而居守卧護
北門凜然元帥之威屹若長城之重然而蒼生注想徯
安石之歸朝赤鳥流音樂姬公之復位洪惟睿聖屬意

典刑竚膺一節之趨亟正三旌之貴加以誨人不倦聞
善若驚字表成褒遠宗於聖教月評定譽丕振於先芬
最於道以為高誠其言之有味籠中丹桂並洩勃以魚
收幕下紅蓮雜蒹葭而與進某是敢仰覘熒煌之坐俯
陳固陋之心冀披霧以垂仁許拜塵而展敬與其潔已
獲聆謦欬之音振以餘光俾預走趨之役然後周旋孫
閣附麗膺門雖互鄉之難言而童子之可教游揚盛業
尚不愧於曹丘奔奏下風或庶幾於子贛是惟論報非

敢飾詞卑疵而前隕越於下卑情無任惶懼激切俟命
之至謹修啟事祇候執見伏惟鈞慈俯賜鑒念

見李邦直啟

某啟竊以牛角蕪音亟躡伯廷之駿雞鳴淺技許陪相
室之游是知喬岳隱天無嫌於蟻冢巨溟經地兼受於
坳堂顧惟樗櫟之資夙仰鈞衡之重執鞭忻慕雖傾平
日之誠掃門自通竊遇茲辰之幸邈跼熒煌之坐惕修
固陋之容覲薄霽於威嚴庶少陳於悃悞恭惟判府安

撫匿犀異表指李慶源丁咸五之昌辰契半千之嘉運
道映民先之覺弼符帝賚之良鬱若長卿挾天廷而摘
藻洋乎董相明王事以對書亟升俊造之科游中方聞
之選取如拾芥掇若承蜩名藉甚以藹聞帝俞哉而俾
試金聲玉振獨諧雅正之音龍章鳳姿迥出囂埃之外
培迅風而直上批大郤以一揮浸隆挾纊之知沓奉出
綸之寵石渠天祿分甲部以校讎西掖北門備咫尺之
顧問言沃心而必聽聲揭日以彌昭築漢室之壇旣擅

無雙之譽補唐家之袞必推第一之流果膺舟楫之求
爰正股肱之託時方咨於改瑟政尤重於肅機委戴胄
於網維人知稱職任韋公於筦轄吏率望風坐恢稽古
之謩曰奏真儒之效謀王體而斷國論運籌帷幄之中
窺紫闥而攀台階躋民仁壽之域方注廟堂之意暫均
屏翰之休分西洛之麟符保釐益重總常山之虎旅節
制彌尊湛遼海以澄波凜轅門而增氣婉婉幙中之畫
恢恢堂上之竒敵重南賓懾四朝之元老邦輕北顧倚

萬里之長城頌傳口而靡容功紀常之不足洪惟二聖
欽乃四鄰顧當軸之方虛諒前旒之有待竚聆師錫歸
秉國鈞雨欲降而雲興羹將和而梅用姬公未復久傳
赤鳥之謠安石旣登大慰蒼生之望卓為茂業允屬壯
猶實輿議之固然匪私期之獨爾矧復雌黃標士吐握
賓賢闢東閣以烝髦譽西山而長價采葑采菲而不咎
下體在陵在汴而皆使成材兼容乎構櫨侏儒靡間於
粗梨橘柚人爭望履家欲彈冠羞吳坂以倚輶願錐囊

而脫穎白駒皎皎赴場藿以朋來黃鳥交交戾丘阿而
萃止俯慚下品仰丐餘光竊念植性蠢愚挺生嵒窳孰
實嗟其匏落棗膏劇於鈍昏竊懷肯構之思強起為箕
之志伏膺方冊勉溫就傳之傳屈首詩書粗識趨隅之
諾辰去矣其曷速思軋然而若抽杵白論交居速牛醫
之誚泮雍議禮竟招狗曲之譏勤雖各於分陰功莫臻
於寸進稚圭之節不亢空事解頤季子之氣尚存更堅
刺股取小人之學為利慕先王之道滿門未甘覩目於

青衫妄欲奮身於黃卷靜笑蓬心之拙宛同蝸角之爭
呻畢徒勞殆迷於刻楮繡鑿已誤俄悔於雕蟲達靡見
於大成畫且慚於中道勉投英元本缺竊廁翰場一鳴無意
於驚人十駕信艱於及驥豈繫弱植預彼翹薪並程涉
獵之文不漏網羅之目蠅頭生於匠意因誤筆以成工
犬尾備乎禮容本續貂而見貴名浮地屏僥甚鵜梁每
集木以包羞恩施松而擇蔭逖趨大府筮覲宗工敢求
尺蠖之信覲獲仞墻之見載念親庭發策附鵬翼以凌

虛小已觀光偕驪珠而得雋接迹僅踰於三紀聯華重
美於一時雖葛藟木樛黃緣是幸而天冠地屨跂及幾
希詠肥泉以增思撫濁涇而興歎世非北海敢自列於
通家童比互鄉尚或靳於與進恭翼有容之德曲推成
小之仁苟斂版之不違何封侯之足議嚴溫在望懼盤
躒以非宜塊圯均私託幘幪而永賴鞠躬若厲踏地靡
遑瀆儻恕於再三命敢聞於進退

賀戶部李尚書啟

伏審恩布言綸偃紅牙之節鉞任顯教典動碧落之星
辰惟大儒可以富民在明上乃能選衆有識之士相賀
於朝洪惟右文甚盛之辰若昔不世非常之治君臣以
體貌相遇輔弼以腹心自期論道經邦或暫均於休逸
分職帥屬復迭奉於憂勤所以子房行少傅而不辭曲
逆當左相而無間授受之美古今所同恭以某官百世
宗師四朝綦杖德履畢公之舊道傳孟氏之醇節彼具
巖石之瞻慨然有天下之志入都筦轄世穆穆以迂衡

出殿藩垣衆熙熙而莫枕兩宮倚以為重四海徯而望
歸果膺一節之嚴還陟六卿之貴舊人任正而下無異
論元老壯猶則敵有肅心矧當大計之司尤急方今之
務承平浸久常費不貲調九年之蓄而歲或未充課百
畝之田而利亦有限欲節用則理有難損思使人則財
將易窮非務穡之不精顧析毫之已盡法豈無弊勢仍
使然式煩康濟之謨少擴經綸之蘊蓋期家給以人足
不專貫朽而粟陳帝倚茂先決定廟堂之算時咨元凱

論處軍國之宜有德進而朝廷尊巨川濟而舟楫用卽
符周卜行霈商霖力運陶鈞播羣工於大冶手調鼎鼐
豐庶俗於美和懋昭梁棟之隆永錫華夷之慶某半通
賤吏一介書生比干制閫之威嘗獲趨隅之幸銜恩至
厚聞命增榮雖未能望弩矢之驅伏車鸞而展謁猶足
以歌聖賢之頌同厦燕以摠情願偕仁壽之民均被明
良之化瞻依抃頌倍越等倫

賀荆尚書啟

右某啟伏審知府安撫尚書光膺明詔來撫大邦德聲
孚聞衆望允愜伏惟慶慰恭以某官學貫流俗論通古
今浩然有王佐之材足以任天下之重四海服其勁節
一時號為偉人直道而行竟莫肯以碌碌不容何病仍
為是以栖栖身暫退於江湖譽益隆於中外果膺訪洛
首奉賜環亟躋延閣之嚴卽付元戎之寄惟趙北際則
燕南垂在昔常號於支藩厥今最雄於諸鎮丈夫習俗
尚慷慨以悲歌北敵玩盟或恫疑而虛喝宜有磊落大

度之士以當方面控馭之權屹然長城隱若敵國肆詔
書之始下傾幕府以相趨某章句小生齏鹽賤職及時
慕義雅有意於執鞭此日趨風廼遂諧於望履雖庇身
之有地實開榮之自天瞻抃交深諭言靡極

賀起居謝舍人啟

伏審拜命中宸躋榮右史官因望重職以人清伏惟慶
慰竊以人主之尊若堂王言之出如綍欲動容周旋中
乎禮故出入起居罔不欽在昔嚴載筆之官近世為修

注之任其責甚重展才至難自非學通古今詞有體要
擅道文麗藻之美懷正言不諱之忠則何以書皆可觀
記必成法求稱是職莫宜於公恭惟起居舍人丈丈造
道高深稟氣剛大久矣講於高義喟然動乎衆心言無
詭隨行不苟合豈獨筆精墨妙溢於文詞固亦雪白蘭
薰好是正直適屆惟新之旦允膺籲俊之求念此選之
稍輕出於近日幸斯文之復振要在茲時穆然聞風翕
爾共慶某登門惟舊蒙眷頗深嗟小子之斐然不忘固

陋謂古人之愚也獨荷知憐竊欣除命之新未遂趨廷
之渴第懷瞻抃莫罄叙陳

賀李邦直帥真定啟

伏審光奉明恩顯臨舊鎮肅頒初政胥慰羣心恭惟慶
慰伏以某官學貫三才行包九德立朝盡大臣之節事
君得君子之宜入居廟堂澤被夷夏出臨藩服風動搢
紳蒼生徯其復歸公議依以為重矧茲趙俗嘗奉蕭規
竹馬前迎盡喜使君之至甘棠故在雅深召伯之思豈

已日而乃孚宜不言而自化且方鈴齋坐嘯玉帳凝神
投壺聊靖於邊氛閉閣不煩於吏事鑑北潭之綠水心
與塵清矚西山之白雲情隨意遠邈矣仁賢之致超然
舒卷之規當久貯於冲懷固匪資於諛聞某登門惟舊
蒙眷頗深雖置散投閒久阻依歸之願巢南嘶北每勤
寤寐之誠竊欣幕府之開遂獲丘隅之託尚茲庀職未
卽趨風踴躍傾瞻倍萬倫等

回賀李元量狀元啟

右某啟伏審簡在上心褒為舉首名光里選聲動士林
伏惟慶慰竊以仕得志而可為道將行其有命夷吾干
祿三見逐而不容稚圭窮經九射策而乃中故易失者
聖人之日難值者君子之時未有奮起妙齡超升上第
視青紫其若拾逼雲霄而已親沛然孰能禦之鴈乎不
可尚已伏惟某官學有家法才高少時議論屈老先生
交游皆前輩行陳太丘之父子羔鴈成羣謝宣遠之弟
兄華萼相飾嘗一戰而已霸洎再鼓而不衰凜先多士

之鳴嶮處諸儒之右惟古三晉實今兩河英豪尤盛於
昔時風采稍衰於近世蓋或以儒為戲幾且謂秦無人
幸聞擅場足使增氣矧致身之若此宜進德以何如願
恢任重之圖以副仰高之望某竒隻不耦約結亡竒向
緣檄於大邦豫文於諸彥嘉禾將御輒先農父之嘗神
龜效靈偶出豫且之網雖假手以何力顧聞風而自傾
敢圖謙沖過用推致鷦鷯既舉顧回首以何知珍兔已
羞在敝蹄而可棄竊深慚佩靡罄叙陳

賀祝德升先輩啟

伏審策名藝苑得雋賢科昔之所期今以為慰惟邑里
之輕重視人物之盛衰有如吾鄉密邇王國山河控帶
迹皆霸王之餘風氣雅馴俗有衣冠之舊昔相傳為多
士居見紀於四隣久乎寂寥曠莫興起至乃闔郡無應
書者累年遂令後生益絕望於前輩父老之所歎息閭
閻以為誚譏儻非豪傑之材孰鼓敗衰之氣猶賴吾友
再張我軍敢獨擅於私榮當大同於衆喜顧此逢辰之

始是惟兼濟之初功名非不可為富貴皆所自有願勤
宣於令德竊敢在於下風此日一鳴有志者事竟成也
異時千里將沛然孰能禦之誰曰不然吾猶有望幸加
餐而無怠思藏器以自珍情形於言書不盡意

賀大名韓觀文啟

伏審遠驅鈞旆近屆都城肅膺占筮之良肇總居留之
重典型惟舊潤澤咸新神明所依福祿自至恭以某官
若古夔高逢時舜堯命乃繫於黎元功獨高於社稷暫

資元老聊護北門朝廷賴以殿邦天下屬其為相竚開
黃閣式慰蒼生某方幸執鞭遽嗟墜雨雖登門之未久
實受恩之已深魯析聞邾幸屬城之不遠代馬依北豈
故軒之敢忘惟益厲於操修庶少酬於顧遇竊懷感戀
豈勝叙陳

代賀章端明啟

伏審顯被優恩榮遷峻職聽聞所逮歆羨惟均伏惟慶
慰恭以某官忠載歷朝智兼數器具著休嘉之績雅推

踐履之勤曾是西戎肆為邊患費轉輸者億計勞經畧者累年爰分西顧之憂遂掌元戎之柄運奇兵於堂上得強敵於目中嗟鼠技以浸窮覺蝟鋒之頓屈既翦心腹之黨遂城襟帶之衝奏凱未央御壽觴於黼坐告成永裕攄赫怒於先王兵所向以無前功於茲而為盛式膺異數用答殊勲加祕殿之隆名壯師垣之重望轅門增氣幕府相趨是宜具酒以犒軍將且奉主而入覲方叔振旅既顯於壯猷吉甫來歸佇膺於多祉蓋符清議

非出私期側聞師錫之榮莫展賓客之慶徒深瞻抃豈
罄叙陳

回王履道先輩啟

右某啟伏審策名英路得雋賢科昔之所期今以為慰
惟邑里之輕重視人物之盛衰顧今中山實古王國山
河控帶迹皆唐漢之陳風氣雅馴俗有衣冠之舊是宜
多士夫豈乏人久乎寂寥曠莫興起至乃闔郡無應書
者累年遂令後生益絕望於前輩父老之所嘆息閭閻

以為誚譏儻非豪傑之才孰鼓敗衰之氣賴我良友張
吾此軍伏惟某官行高鄉評學有師法未任戴冠之日
已出驚人之鳴曾屢鼓之不衰殆百發而皆中固宜決
勝誰與爭鋒萬鍾何加我馬一第蓋恩子耳某辱游最
久投分頗深聽伯牙之琴舊已欣於同志忘孟軻之寐
今尤喜於得人敢圖謙沖特枉賤翰方此逢辰之始實
惟事道之初願藏器以自珍思為時而加飯言非盡意
書豈能文